

kalpataru punyaataama,  
prem sudha shiv naam  
hitakaarak sanjeevane,  
shiv chintan aviraam  
patik paavan jaise madhur,  
shiv rasan ke gholak  
bhakti ke hansa hee chuge,  
motee ye anamol  
jaise tanik suhaaga,  
sone ko chamakae  
shiv sumiran se aatma,  
adhbhut nikharee jaaye  
jaise chandan vrksh ko,  
daste nahin hai naag  
shiv bhakto ke chole ko,  
kabhee lage na daag

Om Namah Shivay, Om Namah Shivay !

daya nidhi bhooteshvar,  
shiv hai chatur sujaan  
kan kan bheetar hai,  
base neel kanth bhagavaan  
chandr chood ke trinetr,  
uma pati vishvaas  
sharanaagat ke ye sada,

kaate sakal klesh  
shiv dvaare prapanch ka,  
chal nahin sakata khel  
aag aur paanee ka,  
jaise hota nahin hai mel  
bhay bhanjan nataraaj hai,  
damaroo vaale naath  
shiv ka vandhan jo kare,  
shiv hai unake saath

Om Namah Shivay, Om Namah Shivay !

laakho ashvamedh ho,  
sou ganga snaan  
inase uttam hai kahee,  
shiv charanon ka dhyaan  
alakh niranjan naad se,  
upaje aatma gyaan  
bhatake ko raasta mile,  
mushkil ho aasaan  
amar gunon ke khaan hai,  
chit shuddhi shiv jaap  
satsangateer mein baith kar,  
karalo pashchaataap  
lingeshvar ke manan se,  
siddh ho jaate kaaj  
namah shivaay ratata ja,  
shiv rakhenge laaj

Om Namah Shivay, Om Namah Shivay !

shiv charanon ko chhoone se,  
tan man pavan hoye  
shiv ke roop anoop kee,  
samata kare na koee  
maha bali maha dev hai,  
maha prabhu maha kaal  
asuraanakhandan bhakt kee,  
peeda hare tatkaal  
sharva vyaapee shiv bhola,  
dharm roop sukh kaaj  
amar ananta bhagavanta,  
jag ke paalan haar  
shiv karata sansaar ke,  
shiv srshti ke mool  
rom rom shiv ramane do,  
shiv na jaeo bhool

Om Namah Shivay, Om Namah Shivay !

|| Part 2 & 3 ||

shiv amrt kee paavan dhaara,  
dho detee har kasht hamaara  
shiv ka kaaj sada sukhadaayee,  
shiv ke bin hai kaun sahaayee  
shiv kee nisadin kee jo bhakti,

denge shiv har bhay se mukti  
maathe dharo shiv naam kee dhulee,  
toot jaayegee yam ki soolee  
shiv ka saadhak duhkh na maane,  
shiv ko harapal sammukh jaane  
saump dee jisane shiv ko dor,  
loote na usako paancho chor  
shiv saagar mein jo jan doobe,  
sankat se vo hans ke joojhe  
shiv hai jinake sangee saathee,  
unhen na vipada kabhee sataatee  
shiv bhaktan ka pakade haath,  
shiv santan ke sada hee saath  
shiv ne hai brhmaand rachaaya,  
teeno lok hai shiv ki maaya  
jin pe shiv kee karuna hotee,  
vo kankad ban jaate motee  
shiv sang taan prem kee jodo,  
shiv ke charan kabhee na chhodo  
shiv mein manava man ko rang le,  
shiv mastak kee rekha badale  
shiv har jan kee nas-nas jaane,  
bura bhala vo sab pahachaane  
ajar amar hai shiv avinaashee,  
shiv poojan se kate chauraasee  
yahaan vahaan shiv sarv vyaapak,  
shiv kee daya ke baniye yaachak

shiv ko deejo sachchee nishthaan,  
hone na dena shiv ko rushta  
shiv hai shraddha ke hee bhooke,  
bhog lage chaahe rookhe-sookhe  
bhaavana shiv ko bas mein karatee,  
preet se hee to preet hai badhatee  
shiv kahate hai man se jaago,  
prem karo abhimaan tyaago

|| doha ||

duniya ka moh tyaag ke shiv mein rahiye leen.  
sukh-dukh haani-laabh to shiv ke hee hai adheen..

bhasm ramaiya paarvatee vallbh,  
shiv phaladaayak shiv hai durlabh  
maha kautukee hai shiv shankar,  
trishool dhaaree shiv abhayankar  
shiv kee rachana dharatee ambar,  
devo ke svaamee shiv hai digambar  
kaal dahan shiv roondan poshit,  
hone na dete dharm ko dooshit  
durgaapati shiv girijaanaath,  
dete hai sukhon kee prabhaat  
srshtikarta tripuradhaaree,  
shiv kee mahima kahee na jaatee  
divya tej ke ravi hai shankar,  
pooje ham sab tabhee hai shankar

shiv sam aur koe aur na daanee,  
shiv ke bhakti hai kalyaanee  
kahate munivar gunee sthaanee,  
shiv ke baaten shiv hee jaane  
bhakton ka hai shiv priy halaahal,  
nekee ka ras baatante har pal  
sabake manorath siddh kar dete,  
sabakee chinta shiv har lete  
bam bhola avadhoot savaroopa,  
shiv darshan hai ati anupa  
anukampa ka shiv hai jharana,  
harane vaale sabakee trshna  
bhooto ke adhipati hai shankar,  
nirmal man shubh mati hai shankar  
kaam ke shatru vish ke naashak,  
shiv mahaayogee bhay vinaashak  
roodr roop shiv maha tejasvee,  
shiv ke jaisa kaun tapasvee  
himagiree parvat shiv ka dera,  
shiv sammukh na tike andhera  
laakhon sooraj ke shiv jyoti,  
shastron mein shiv upamaan hoshee  
shiv hai jag ke srjan haare,  
bandhu sakha shiv isht hamaare  
gau braahman ke ve hitakaaree,  
koe na shiv sa par upakaaree

|| doha ||

shiv karuna ke srot hai shiv se kariyo preet.  
shiv hee param puneet hai shiv saache man meet.

shiv sarpo ke bhooshanadhaaree,  
paap ke bhakshan shiv tripuraaree  
jataajoot shiv chandrashekhar,  
vishv ke rakshak kala kaleshvar  
shiv kee vandana karane vaala,  
dhan vaibhav pa jaaye niraala  
kasht nivaarak shiv kee pooja,  
shiv sa dayaalu aur na dooja  
panchamukhee jab roop dikhaave,  
daanav dal mein bhay chha jaave  
dam-dam damaroo jab bhee bole,  
chor nishaachar ka man dole  
ghot ghaat jab bhang chadhaave,  
kya hai leela samajh na aave  
shiv hai yogee shiv sanyaasee,  
shiv hee hai kailaas ke vaasee  
shiv ka daas sada nirbheek,  
shiv ke dhaam bade ramaneeek  
shiv bhrkuti se bhairav janme,  
shiv kee moorat raakho man mein  
shiv ka archan mangalakaaree,  
mukti saadhan bhav bhayahaaree  
bhakt vatsal deen dyaala,

gyaan sudha hai shiv krpaala  
shiv naam kee nauka hai nyaaree,  
jisane sabakee chinta taaree  
jeevan sindhu sahaj jo tarana,  
shiv ka harapal naam sumirana  
taarakaasur ko maarane vaale,  
shiv hai bhakto ke rakhavaale  
shiv kee leela ke gun gaana,  
shiv ko bhool ke na bisaraana  
andhakaasur se dev bachaaye,  
shiv ne adbhut khel dikhaaye  
shiv charano se lipate rahiye,  
mukh se shiv shiv jay shiv kahiye  
bhasmaasur ko var de daala,  
shiv hai kaisa bhola bhaala  
shiv teertho ka darshan keejo,  
man chaahe var shiv se leejo

|| doha ||

shiv shankar ke jaap se mit jaate sab rog.  
shiv ka anugrah hote hee peeda na dete shok..

brhama vishnu shiv anugaamee,  
va hai deen heen ke svaamee  
nirbal ke balaroop hai shambhu,  
pyaase ko jalaroop hai shambhu  
raavan shiv ka bhakt niraala,



shiv ko dee dash sheesh ki maala  
garv se jab kailaash uthaaya,  
shiv ne angootha se tha dabaaya  
dukh nivaaran naam hai shiv ka,  
ratn hai vo bin daam shiv ka  
shiv hai sabake bhaagyavidhaata,  
shiv ka sumiran hai phaladaata  
shiv dadheechi ke bhagavanta,  
shiv kee taree amar ananta  
shiv ka sevaadaar sudarshan,  
saanse kar dee shiv ko arpan  
mahaadev shiv aughadadaanee,  
baayen ang mein saje bhavaanee  
shiv shakti ka mel niraala,  
shiv ka har ek khel niraala  
shambhar naamee bhakt ko taara,  
chandrasen ka shok nivaara  
pingala ne jab shiv ko dhyaaya,  
deh chhootee aur moksh paaya  
gokarn kee chan chooka anaaree,  
bhav saagar se paar utaaree  
anasuiya ne kiya aaraadhan,  
toote chinta ke sab bandhan  
bel patto se pooja kare chandaalee,  
shiv kee anukampa huee niraalee  
markandey kee bhakti hai shiv,  
durvaasa kee shakti hai shiv

raam prabhu ne shiv aaraadha,  
setu kee har tal gae baadha  
dhanushabaan tha paaya shiv se,  
bal ka saagar tab aaya shiv se  
shree krshn ne jab tha dhyaaya,  
dash putron ka var tha paaya  
ham sevak to svaamee shiv hai,  
anahad antaryaamee shiv hai

|| doha ||

deen dayaalu shiv mere, shiv ke rahiyo daas.  
ghat ghat kee shiv jaanate, shiv par rakh vishvaas..

parashuraam ne shiv gun gaaya,  
keenha tap aur pharasa paaya  
nirgun bhee shiv shiv niraakaar,  
shiv hai srshti ke aadhaar  
shiv hee hote moortimaan,  
shiv hee karate jag kalyaan  
shiv mein vyaapak duniya saaree,  
shiv kee siddhi hai bhayahaaree  
shiv hai baahar shiv hee andar,  
shiv hee rachana saat samundr  
shiv hai har ik ke man ke bheetar,  
shiv hai har ek kan kan ke bheetar  
tan mein baitha shiv hee bole,  
dil kee dhadakan mein shiv dole

ham kathaputalee shiv hee nachaata,  
nayanon ko par najar na aata  
maatee ke rangadaar khilaune,  
saanval sundar aur salone  
shiv ho jode shiv ho tode,  
shiv to kisee ko khula na chhode  
aatma shiv paramaatma shiv hai,  
dayaabhaav dharmaatma shiv hai  
shiv hee deepak shiv hee baatee,  
shiv jo nahin to sab kuchh maatee  
sab devo mein jyeshth shiv hai,  
sakal guno mein shreshth shiv hai  
jab ye taandav karane lagata,  
brhmaand saara darane lagata  
teesara chakshu jab jab khole,  
traahi traahi yah jag bole  
shiv ko tum prasann hee rakhana,  
aastha lagn banaaye rakhana  
vishnu ne kee shiv kee pooja,  
kamal chadhaoon man mein sujha  
ek kamal jo kam tha paaya,  
apana sundar nayan chadhaaya  
saakshaat tab shiv the aaye,  
kamal nayan vishnu kahalaaye  
indradhanush ke rango mein shiv,  
santo ke satsangon mein shiv

|| doha ||

mahaakaal ke bhakt ko maar na sakata kaal.  
dvaar khade yamaraaj ko shiv hai dete taal..

yagy soodan maha raudr shiv hai,  
aanand moorat natavar shiv hai  
shiv hee hai shmashaan ke vaasee,  
shiv kaaten mrtyulok kee phaansee  
vyaaghr charam kamar mein sohe,  
shiv bhakton ke man ko mohe  
nandee gan par kare savaaree,  
aadinaath shiv gangaadhaaree  
kaal ke bhee to kaal hai shankar,  
vishadhaaree jagapaal hai shankar  
mahaasatee ke pati hai shankar,  
deen sakha shubh mati hai shankar  
laakho shashi ke sam mukh vaale,  
bhang dhatoore ke matavaale  
kaal bhairav bhooto ke svaamee,  
shiv se kaampe sab phalagaamee  
shiv hai kapaalee shiv bhasmaangee,  
shiv kee daya har jeev ne maangee  
mangalakarta mangalahaaree,  
dev shiromani mahaasukhakaaree  
jal tatha vilv kare jo arpan,  
shraddha bhaav se kare samarpan  
shiv sada unakee karate raksha,

satyakarm kee dete shiksha  
ling par chandan lep jo karate,  
unake shiv bhandaar hain bharate  
64 yoganee shiv ke bas mein,  
shiv hai nahaate bhakti ras mein  
vaasuki naag kanth kee shobha,  
aashutosh hai shiv mahaadeva  
vishvamoorti karunaanidhaan,  
maha mrtyunjay shiv bhagavaan  
shiv dhaare rudraaksh kee maala,  
neeleshvar shiv damaroo vaala  
paap ka shodhak mukti saadhan,  
shiv karate nirdayee ka mardan

|| doha ||

shiv sumarin ke neer se dhool jaate hai paap.  
pavan chale shiv naam kee udate dukh santaap..

panchaakshar ka mantr shiv hai,  
saakshaat sarveshvar shiv hai  
shiv ko naman kare jag saara,  
shiv ka hai ye sakal pasaara  
ksheer saagar ko mathane vaale,  
rddhi seedhee sukh dene vaale  
ahankaar ke shiv hai vinaashak,  
dharm-deep jyoti prakaashak  
shiv bichhuvan ke kundaladhaaree,

shiv kee maaya srshti saaree  
mahaananda ne kiya shiv chintan,  
rudraaksh maala kinhee dhaaran  
bhavasindhu se shiv ne taara,  
shiv anukampa apampaara  
tri-jagat ke yash hai shivajee,  
divy tej gaureesh hai shivajee  
mahaabhaar ko sahane vaale,  
vair rahit daya karane vaale  
gun svaroop hai shiv anoopa,  
ambaanaath hai shiv taparooma  
shiv chandeesh param sukh jyoti,  
shiv karuna ke ujval motee  
punyaatma shiv yogeshvar,  
mahaadayaalu shiv sharaneshvar  
shiv charanan pe mastak dhariye,  
shraddha bhaav se archan kariye  
man ko shivaala roop bana lo,  
rom rom mein shiv ko rama lo  
maathe jo bhakt dhool dharenge,  
dhan aur dhan se kosh bharenge  
shiv ka baak bhee banana jaave,  
shiv ka daas param pad paave  
dashon dishaon me shiv drshti,  
sab par shiv kee krpa drshti  
shiv ko sada hee sammukh jaano,  
kan-kan beech base hee maano

shiv ko saumpo jeevan naiya,  
shiv hai sankat taal khivaiya  
anjali baandh kare jo vandan,  
bhay janjaal ke toote bandhan

|| doha ||

jinakee raksha shiv kare, maare na usako koy.  
aag kee nadiya se bache, baal na baanka hoy..

shiv daata bhola bhandaaree,  
shiv kailaashee kala bihaaree  
sagun brahm kalyaan karta,  
vighn vinaashak baadha harta  
shiv svaroopinee srshti saaree,  
shiv se prthvee hai ujiyaaree  
gagan deep bhee maaya shiv kee,  
kaamadhenu hai chhaaya shiv kee  
ganga mein shiv , shiv me ganga,  
shiv ke taare turat kusanga  
shiv ke kar mein saje trishoola,  
shiv ke bina ye jag nirmoola  
svarnamayee shiv jata niraalee,  
shiv shambhoo kee chhata niraalee  
jo jan shiv kee mahima gaaye,  
shiv se phal manavaanchhit paaye  
shiv pag pankaj savarg samaana,  
shiv paaye jo taje abhimaana

shiv ka bhakt na duhkh me dolen,  
shiv ka jaadoo sir chadh bole  
paramaanand anant svaroop,  
shiv kee sharan pade sab koopa  
shiv kee japiyo har pal maala,  
shiv kee najar me teeno qaala  
antar ghat me ise basa lo,  
divy jot se jot mila lo  
nam: shivaay jape jo svaasa,  
pooreen ho har man kee aasa

|| doha ||

paramapita paramaatma pooran sachchidaanand.  
shiv ke darshan se mile sukhadaayak aanand..

shiv se bemukh kabhee na hona,  
shiv sumiran ke motee pirona  
jisane bhajan hai shiv ke seekhe,  
usako shiv har jagah hee dikhe  
preet mein shiv hai shiv mein preete,  
shiv sammukh na chale aneeti  
shiv naam kee madhur sugandhee,  
jisane mast kiyo re nandee  
shiv nirmal 'nirdosh sanjay' niraale,  
shiv hee apana virad sambhaale  
param purush shiv gyaan puneeta,  
bhakto ne shiv prem se jeeta



|| doha ||

aantho pahar araadheey jyotirling shiv roop.  
nayanan beech basaiye shiv ka roop anoop..

ling may saara jagat hain, ling dharatee aakaash  
ling chintan se hot hain sab paapo ka naash  
ling pavan ka veg hain, ling agni kee jyot  
ling se paataal hain ling varun ka strot  
ling se hain vanaspati, ling hee hain phal phool  
ling hee ratn svaroop hain, ling maatee nirdhoop

ling hee jeevan roop hain, ling mrtyulingakaar  
ling megha ghanaghor hain, ling hee hain upachaar  
jyotirling kee saadhana karate hain teeno log  
ling hee mantr jaap hain, ling ka room shlok  
ling se bane puraan, ling vedo ka saar  
ridhiya siddhiya ling hain, ling karata karataar

praatakaal ling poojiye poorn ho sab kaaj  
ling pe karo vishvaas to ling rakhenge laaj  
sakal manorath se hot hain dukho ka ant  
jyotirling ke naam se sumirat jo bhagavant  
maanav daanav rshimuni jyotirling ke daas

sarv vyaapak ling hain pooree kare har aas  
shiv rupee is ling ko pooje sab avataar  
jyotirlingon kee daya sapane kare saakaar

ling pe chadhane vaidy ka jo jan le parasaad  
unake hraday mein baje shiv karoon ka naad

mahima jyotirling kee jaenge jo log  
bhay se mukti paenge rog rahe na shob  
shiv ke charan saroj too jyotirling mein dekh  
sarv vyaapee shiv badale bhaagy teere  
daareen jyotirling pe ganga jal kee dhaar  
kareng gangaadhar tujhe bhav sindhu se paar  
chit siddhi ho jae re lingo ka kar dhyaan  
ling hee amrt kalash hain ling hee daya nidhaan

Om Namah Shivay, Om Namah Shivay !

|| Part 4 & 5 ||

jyotirling hai shiv kee jyoti,  
jyotirling hai daya ka motee  
jyotirling hai ratnon kee khaan,  
jyotirling mein rama jahaan  
jyotirling ka tez niraala,  
dhan sampati dene vaala  
jyotirling mein hai nat naagar,  
amar gunon ka hai ye saagar  
jyotirling kee kee jo seva,  
gyaan paan ka paoge meva  
jyotirling hai pita saamaan,  
sashti isakee hai santaan

jyotirling hai isht pyaare,  
jyotirling hai sakha hamaare  
jyotirling hai naareeshvar,  
jyotirling hai shiv vimalleshvar  
jyotirling gopeshvar daata,  
jyotirling hai vidhi vidhaata  
jyotirling hai sharrendashvar svaamee,  
jyotirling hai antaryaamee  
satayug mein ratno se shobhit,  
dev jaano ke man ko mohit  
jyotirling hai atyant sundar,  
chhatta isakee brahmaand andar  
treta yug mein svarn sajaata,  
sukh sooraj ye dhyaan dhvajaata  
sakti srshti man kee karatee,  
nisadin pooja bhajan bhee karatee  
dvaapar yug mein paaras nirmit,  
gunee gyaanee sur nar sevee  
jyotirling sabake man ko bhaata,  
mahamaarak ko maar bhagaata  
kalayug mein paarthiv kee moorat,  
jyotirling nandakeshvar soorat  
bhakti shakti ka varadaata,  
jo daata ko hans banata  
jyotirling par pushp chadhao,  
kesar chandan tilak lagao

jo jaan karen doodh ka arpan,  
ujale ho unake man darpan

|| doha ||

gyotirling ke jaap se tan man nirmal hoye.  
isake bhakton ka manava kare na vichalit koee..

somanaath sukh karane vaala,  
som ke sankat harane vaala  
daksh shraap se som chhudaaya,  
som hai shiv kee adbhut maaya  
chandr dev ne kiya jo vandan,  
som ne kaate dukkh ke bandhan  
gyotirling hai sada sukhadaayee,  
deen heen ka sahaayee  
bhakti bhaav se ise jo dhyaaye,  
man vaanee sheetal tar jaaye  
shiv kee aatma roop som hai,  
prabhu paramaatma roop som hai  
yanha upaasana chandr ne kee,  
shiv ne usakee chinta har lee  
isake rath kee shobha nyaaree,  
shiv amrt saagar bhavabhayadhaaree  
chandr kund mein jo bhee nahaaye,  
paap se ve jan mukti pae  
chh: kushth sab rog mitaaye,  
naaya kundan pal mein banaave

malikaarjun hai naam nyaara,  
shiv ka paavan dhaam pyaara  
kaartikey hai jab shiv se roothe,  
maata pita ke charan hai chhoote  
shree shailesh parvat ja pahunche,  
kasht bhay paarvatee ke man mein  
prabhu kumaar se chalee jo milane,  
sang chalana maana shankar ne  
shree shailesh parvat ke oopar,  
gae jo donon uma maheshvar  
unhen dekhakar kaartikey uth bhaage,  
aur kumaar parvat par viraaje  
janha shrit hue paaravatee shankar,  
kaam banaave shiv ka sundar  
shiv ka arjan naam suhaata,  
malika hai meree paaravatee maata  
ling roop ho jahaan bhee rahate,  
malikaarjun hai usako kahate  
manavaanchhit phal dene vaala,  
nirbal ko bal dene vaala